

Priča o porodici Zahida Mekića

REGIONALNI STAMBENI PROGRAM JE MENI “POPUT AMERIKE”



Zahid Mekić je samohrani otac četiri kćerke. Rodio se i odrastao u okolini Kaćuna, naselja na području Busovače, u kojem i danas živi. Prije rata je radio u tvornici ploča “Medijapan” u Busovači. *“U to vrijeme se živjelo dobro. Od tadašnje plate sam uspio sagraditi kuću i štalu”,* govori Zahid. U ratnom periodu je, zbog opće nesigurnosti koja je vladala, sa porodicom napuštao kuću i najčešće bi izbjegao po okolnim selima gdje se osjećao sigurnije. Zahid kaže: *“Danas je slika potpuno drugačija, međuljudski odnosi u Busovači su dobrosusjedski, mještani se družu, posjećuju i kad je potrebno međusobno pomažu”*.

Zahidova kuća je u ratu pretrpila štete od granata i metaka, popucali su zidovi i svi prozori. Zahid se skupa sa kćerkama brine o kući, sve što je dotrajalo sam popravljao, a najveći problem mu stvara vlaga u prizemlju kuće. Kao korisnici Regionalnog stambenog programa porodica Mekić je

dobila pomoć za rekonstrukciju njihove kuće. U toku su radovi na rekonstrukciji koji obuhvataju kompletnu sanaciju krova i enterijera te postavljanje fasade, u skladu sa smjericama RSP-a, čime će se značajano poboljšati životni uslovi ove porodice. Bašta ovog domaćina je primjer urednosti i vrijednog rada. Prije dvije godine je iznad kuće zasadio dunum zemljišta sa 800 sadnica malina sorte “vilanet”, te pola dunuma malina zimske sorte “polka”. Maline proizvodi u potpunosti na organski način, ima zagaranovanog otkuplivača, a skupa s kćerkom je pokrenuo certifikaciju za organsku proizvodnju. Kaže da je oduvijek imao kravu. To je najbolji način da se prehrane, a sve što prevazilazi njihove potrebe, uspije da proda. Sadašnju kravu ima već pet godina, svake godine je imala tele, što je Zahidu i njegovoj porodici donosilo i dodatne prihode. Posebnost porodice Mekić je u izuzetno lijepom, harmoničnom i domaćinskom porodičnom odnosu.





Premda su imale teško djetinjstvo, Zahidove četiri kćerke su uspješne mlade djevojke, koje na svaki način pomažu svom ocu, kako u prevazilaženju različitih životnih problema, tako i u svakodnevnim poslovima u kući i na imanju. Najstarija kćerka je udata i živi nedaleko od rodne kuće. Druga po starini kćerka je poljoprivredni tehničar, nezaposlena, prijavljena na Biro za zapošljavanje i nada se da će se negdje ukazati potreba za njenim zanimanjem, te da će dobiti posao. Njeno znanje u oblasti poljoprivrede je neprocjenjivo, što se odražava na dobar prinos zasada malina i krompira. Treća kćerka je odlična učenica 4.

razreda Srednje mašinske tehničke škole, a želja joj je da postane učiteljica razredne nastave. Najmlađa Zahidova kćerka je, kako kaže, i najambicioznija. Pohađa 1. razred Srednje ekonomske škole, smjer bankarstvo, što oca Zahida primjetno čini posebno sretnim i ponosnim.



Timski rad, nesebično zalaganje i međusobna ljubav atributi su koji krasi ovu porodicu. Zahid će sa svojim kćerkama i ove godine posaditi krompire i drugo povrće, a i sjemena koja je dobio kroz podršku od organizacije Catholic Relief Services (CRS). Kaže da mu je kosilica, koju je također dobio od strane CRS-a kao korisnik Regionalnog stambenog programa, "poput Amerike" – korisna za cijelu baštu, dobro ga služi, a najviše je koristi za košenje sijena kojim prehrani kravu u zimskom periodu. Porodica Zahida Mekića iskazuje istinsku zahvalnost donatorima za nesebičnu pomoć koju su mu pružili kao korisniku Regionalnog stambenog programa. Uprkos brojnim teškim životnim trenucima, pozitivna energija, borba za opstankom i vrijedan rad, uz dobijenu pomoć od donatora učinili su život ove porodice uspješnim i održivim. (kraj)

